



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu

Tribunál Distritál Baucau

Fevereiru 2015

**Sumáriu prosesu julgamentu kazu iha Tribunál Distritál Baucau-
Períódu Fevereiru 2015**

Introdusaun

Iha Fevereiru 2015, JSMP kontinua hala'o aktividade monitorizasaun ba prosesu julgamentu kazu sira, iha Tribunál Distritál Baucau. Durante períódu ne'e, JSMP monitoriza kazu 27 hosi kazu sira ne'ebé julga iha tribunál refere. Ne'e mós la inklui julgamentu móvel ne'ebé hala'o iha Distritu Viqueque.

Kazu 27 ne'e involve krime ofensa ba integridade fízika simples ho natureza violénsia doméstika hamutuk 6, violasaun seksuál 1, krime dezobiedensia 1, koasaun seksuál no violasaun seksuál 1, maus tratus 1, ofensa ba integridade fizika grave 2, ofensa ba integridade fízika simples 4, omisídiu simples no tentativa omisídiu 2, omisídiu simples no destruisaun, subtrasaun, okultasaun ka profanasaun ba kadaver 1, danu ho violénsia no ofensa ba integridade fizika simples 1, danu simples 1, danu agravadu 1, abuzu seksuál ba menor no sukuestru 1, ofensa ba integridade fizika simples no danu simples 1, abuzu seksuál ba menor ho natureza inestu 1, abuzu seksuál ba menor no agravasaun 1 no kondusaun perigoza 1.

Entretantu kazu 27 ne'e kazu 13 mak tribunál konklui ona nia prosesu no kazu 14 sei iha prosesu nia laran.

Tuir mai deskripsaun sumáriu julgamentu kazu kompletu:

1. Kazu krime Violasaun-Nuc. 0416/12.PDBAU

Kompozisaun tribunál : Kolektivu
Juis : Dr. José Gonçalves
Ministériu Públiku : Dr. Alfonso Lopes
Defeza : Dr. Juvinal Yanes
Konkluzsaun : Adia

Iha 05 Fevereiru 2015, Tribunál Distritál Baucau adia julgamentu ba kazu krime violasaun ne'ebé diskunfia involve arguidu MO hasoru MCB. Kazu ne'e akontese iha 05 Juñu 2012 Venilale, Distritu Baucau.

Prosesu julgamentu ne'e adia tanba juis titular ba kazu ne'e tuir hela formasaun iha Portugal no sei fila fali mai Timor iha fulan Marsu 2015. Tanba ne'e, tribunál marka fali julgamentu ba iha 09 Abril 2015 tuku 14:00 lorokraik.

2. Kazu krime dezobediensia Nuc. 0041/14.BCSIC

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Domingos Barreto
Defeza : Dr. Grigorio de Lima
Konkluzsaun : Absolve

Iha 05 Feveireiru 2015, Tribunál Distritál Baucau prezide julgamentu sumáriu no absolve arguidu Donald Agusto Pires, Anselmo Moniz no Cosme Agostinho nu'udar membru PSHT hosi krime dezobediensia hasoru Estadu RDTL. Kazu ne'e akontese iha 31 Dezembru 2014, iha Suku Kaibada, Distritu Baucau.

Ministériu Públiku akuza katak iha 31 Dezembru 2014 tuku 20:00 kalan, hafoin fila husi misa arguidu sira ho joven sira seluk halibur malu iha Suku Kaibada, Distritu Baucau, no sira diskunfia atu halo runiaun. Bazeia ba informasaun ne'e, PNTL halo operasaun no kaptura arguidu sira inklui sita mós evidensia balu hanesan foto ho imblema PSHT, foto hamutuk ho membru PSHT sira seluk inklui dokumentu eskrita hanesan sertifikadu PSHT nian.

Ministériu Públiku akuza arguidu sira kontra artigu 244 Kódigu Penál kona-ba dezobediensia konjugadu ho rezolusaun Nú.16/2013 kona-ba taka arte marsiais.

Iha prosesu sumáriu arguidu sira konfesa katak momentu ne'e arguidu sira ba misa hamutuk iha igreja Kaibada. Depois fila husi misa hakarak vizita ba sira nian maun Alotu hanesan eis membru PSHT nia uma hodi fó boas festa. Wainhira sira tu'ur hemu hela kafé ne'ebé ofere se hosi uma nain derepente polísia sira to'ó no halo kapturasaun ba arguidu sira.

Iha 12 Feveireiru 2015, tribunál rona testamuña SMF (*membru PNTL*), deklara katak, sira simu orden husi komandante distritu atu ba halo patroliamentu iha Suku Kaibada. Iha momentu patroliamentu ne'e mak hetan arguidu sira iha uma laran diskunfia sira halo enkontru, tanba ne'e polísia kaptura sira hodi tula ba kereta no lori arguidu sira ba eskuadra PNTL Sub-distritu Baucau.

Iha alegasaun finál, ministériu públiku husu ba tribunál atu fó pena suspensaun ba arguidu sira ho tempu naruk hodi evita sira nia hahalok dezobediensia, kontra rezolusaun Nú.16/2013 kona-ba taka arte marsiais.

Entretantu defeza husu ba tribunál atu absolve arguidu sira husi prosesu tanba alegasaun ministériu públiku nia laiha faktus no defeza argumenta katak rezolusaun Nú.16/2013 kona-ba taka arte marsiais la'ós atu diskunfia no evita arguidu sira labele halo vizita familiar ba uma eis membru PSHT sira.

Bazeia faktu sira ne'ebé produz durante julgamentu no alegasaun finál hosi husi ministériu públiku no defeza, tribunál konklui prosesu ne'e absolve arguidu sira.

3. Kazu krime ofensa ba integridade fízika simples ho natureza violénsia doméstika- Nuc. 0300/14.PDBAU

Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Pascaçio de Rosa alves
Defeza : Dr. Jonas H. da Costa
Konkluzau : Kondena ho pena prizaun fulan 6 no suspende ba tinan 1

Iha 05 Feveireiru 2015, Tribunál Distritál Baucau prezide julgamentu leitura sentensa ba kazu ofensa ba integridade fizika simples ho natureza violénsia doméstika ne'ebé involve arguidu FS hasoru nia feen (SA). Kazu ne'e akontese iha 17 Abril 2013, iha Distritu Viqueque.

Antes ne'e, ministériu públiku akuza katak iha 17 Abril 2013, tuku 24:00 kalan, arguidu hirus tanba diskonfia nia feen namora ho ema seluk, no arguidu diskonfia ema ne'e, mak tuda sira nia uma. Tanba ne'e arguidu hirus no tuku dala 2 iha lezada nia isin parte karuk no tuku tan dala 2 iha lezada nia matan fukun.

Iha tribunál arguidu konfesa faktu sira ne'ebé akuza ba nia loos hotu no deklarata katak nia ho lezada diak malu ona. Lezada mós konfirma katak arguidu arepende ba nia hahalok no to' o agora sira nunca iha tan problema.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga lei Nu.7/2010 Lei Kontra Violénsia Doméstika.

Bazeia ba faktu hirak ne'e tribunál konklui prosesu no kondena arguidu ho pena prizaun fulan 6 no suspende tinan 1.

4. Kazu krime koasaun seksuál no violasaun seksuál - Nuc. 0191/14.PDBAU

Kompozisaun Tribunál : Kolektivu
Juis : Dr. Hugo da Cruz Pui, Dr. Afonso Carmona, Dr. José Q.S. Celetino
Ministériu Públiku : Dr. Luis H. Rangel da Cruz
Defeza : Dr. Juvinal Yanes
Konkluzau : Sei kontinua prosesu

Iha 06 Feveireiru 2015, Tribunál Distritál Baucau prezide julgamentu ba kazu krime koasaun seksuál ne'ebé diskonfia komete hosi arguidu RS, hasoru PG. Kazu ne'e akontese iha 04 Marsu 2014, iha RSS-Vila Nova Distritu Baucau.

Ministériu Públiku akuza katak, arguidu halo koasaun seksuál hasoru lezada iha 04 Marsu 2014 tuku 10:00 dadersan. Kazu ne'e akontese bainhira lezada rona ema tuda sira nia uma, no kona iha kalen no tarutu, lezada sai hodi hare no hetan arguidu hamrik hela iha liur no bolu lezada. Maibé lezada tauk no tama fali ba uma laran hodi fó hatene ba nia aman katak, 'arguidu ne'ebá bolu hau maibé hau tauk atu ba hasoru nia.' Maibe lezada nia aman la diskonfia arguidu no haruka tan nia oan feto ne'e ba hasoru arguidu.

Bainhira lezada to' o arguidu aporveita hodi kaer lezada nia liman dada tama ba uma laran no taka odamatan. Arguidu kontinua lori lezada ba liu nia kuartu laran, no hahu halo relasaun seksuál ho lezada. Depois halo relasaun seksuál arguidu haruka lezada hatais lalais nia roupa.

Ministériu Públiku akuza arguidu kontra artigu 171 kódigu penál kona-ba koasaun seksuál konjugadu ho artigu 172 kódigu penál kona-ba violasaun seksuál.

Iha prosesu julgamentu arguidu konfesa katak nia halo duni relasaun seksual ho lezada maibé nega prosesu ne'ebé inputa ba nia. Tuir arguidu katak kazu ne'e akontese tanba iha momentu ne'ebá arguidu haris hela no bainhira haris hotu, lao tama ba uma laran nia hare lezada molik ona, iha kuartu laran no halai hasoru arguidu hodi hakuak nia. Tanba ne'e mak akontese relasaun seksuál ne'e. Depoisde akontesimentu ne'e, arguidu senti tauk no halai liu kedas ba Manatuto tanba tauk ema barak ne'ebé hamrik iha nia uma oin ka liur.

Entretantu lezada kontinua mantein faktu sira ne'ebé nia hato'o ona antes iha ministériu públiku. Lezada deklara katak, kazu ne'e akontese tanba arguidu mak bolu nia wainhira nia atu sai hare ema ne'ebé tuda fatuk ba sira nia uma no kona kalen tarutu.

Lezada deklara liu tan katak arguidu bolu nia maibé lezada lakohi ba, tanba tauk. Maibe arguidu dada lezada nia liman ba arguidu nia uma laran. Lezada tenta atu hakilar maibé arguidu taka metin lezada niaibun no lori liu lezada ba arguidu nia oan sira nia kuartu laran hodi halo relasaun seksuál.

Lezada mós dehan arguidu halo ameasa atu sona mate nia kuandu nia hakilar. Lezada haktuir katak iha momentu ne'ebá arguidu kabala de'it toalla no depois halo relasaun seksuál nia obriga lalais lezada hatais fali roupa no arguidu kabala fali nia toalla. Lezada mós dehan, depois akontesimentu ne'e arguidu halai liu ba Manatuto no xave metin nia iha uma laran, depois mak lezada nia aman kontaktu polísia hodi hasai nia husi arguidu nia uma laran.

Testamuña CG (nu'udar lezada nia aman), depoimenta katak momentu ne'ebá testamuña iha uma laran rona fatuk tarutu iha uma leten no testamuña besik ba janela hare arguidu bolu hela lezada ho liman. Testamuña dehan hare arguidu hakbesik ba lezada no dada lezada nia liman tama ba uma laran no taka odamatan metin. Testamuña, dehan konsege halai ba arguidu nia uma, maibé lakonsege loke odamatan tanba xave metin hosi laran. Tanba ne'e testamuña halai ba bolu viziñu nain 2 atu mai ajuda loke odamatan maibe lakonsege.

Testemuña deklara katak liu tiha minutu balun arguidu sai hosi uma laran no aprosima testemuña no husu atu koalia/rezolve tuir familia de'it, maibe testamuña lakoi no telefone ba polísia. Tanba ne'e mak, arguidu tauk halai liu ba Manatuto ho motor no taka metin lezada iha nia uma laran.

Iha alegasaun finál, ministériu públiku husu ba tribunál atu aplika pena prizaun tinan 14 ba arguidu tanba provadu katak nia komete duni krime halo violasaun seksuál hasoru lezada.

Entretantu defeza husu ba tribunál atu aplika pena ne'ebé kman ka absolve arguidu tanba durante produsaun prova hatudu katak iha faktu balu husi akuzasaun laloos. Defeza argumentu katak, maske lezada no testamuña deklara loloos faktus ne'e, maibé kona-ba ameasa ho tudik la'os deklarasaun husi inkeritu inisiu. Tanba ne'e defeza husu tribunál atu availia prova loloos no absolve arguidu husi akuzasaun ministériu públiku.

Depois rona tiha pozisaun ministériu públiku no defeza, tribunál marka fali prosesu leitura akordaun ba iha 19 Feveireiru 2015 tuku 14:00 lorokraik.

5. Kazu krime maustratus ba kónjuje Nuc. 0064/11.PDBAU

Kompozisaun Tribunál : Singulár
Juis : Dr. Afonso Carmona, Dr. Hugo da Cruz Pui, Dr. José Escurial
Ministériu Públiku : Dr. Domingos Barreto
Defeza : Dr. Juvinal Yanes
Konkluzau : Sei kontinua prosesu

Iha 10 Fevreiru 2015 Tribunál Distritál Baucau kontinua hala'o julgamentu ba arguida PdA ne'ebé komete krime maustratus hasoru lezadu RLB nu'udar nia laen. Kazu ne'e akontese iha 16 Janeiru 2013, iha Baucau Vila, Distritu Baucau.

Ministériu Públiku akuza katak, iha 16 Janeiru 2013 iha tuku 07:00 dader, lazadu ho testamuña MdC tu'ur konversa hela iha uma laran, derepente arguida tama ba tuku lezadu dala 2 iha oin, tebe dala 1 iha kanuruk, kaer lezadu riba ba rai no ameasa ho liafuan katak 'oho tiha mak hau ba komarka.' Lezadu hamrik halai tama ba kuartu laran, maibe arguida tuir ba tebe no tuku odamatan depois lezadu telefone polísia mak arguida halai.

Iha 25Janeiru 2013 tuku 7:00 arguida kontinua halo tan krime hasoru lezadu ho maneira tuku no tebe tan lezadu iha haris fatin.

Ministériu Públiku akuza arguida kontra artigu154 Kódigu Penál kona-ba maustratus ba kónjuje konjugadu ho Lei Kontra Violénsia Doméstika.

Iha audiénsia julgamentu arguida nega la-halo krime hasoru lezadu, nia deklara katak iha 16 Jeneiru 2013 nia la-hatene buat ida tanba momentu ne'e arguida ho nia oan nain 2 ba hamoos du'ut iha to'os, Sr. Jose Alexandre nia uma. Iha 25 Janeiru 2013 arguida dehan nia ba tuir duni lezadu iha haris fatin atu husu nia sim card maibe la-halo problema hasoru lezadu.

Iha julgamentu lezadu mantein akuzasaun hosi ministériu públiku no deklara katak iha momentu ne'ebá akontese arguida halo krime hasoru nia dala 2. Lezadu deklara katak to'o agora sira seidak diak malu no lezadu sei hela ketak, hamutuk ho nia inan aman.

Testamuña MdC deklara katak, momentu ne'e nia laiha fatin akontesimentu maibe lezadu mak ba foti nia kartaun eleitoral atu simu osan idozu nian. Maibe derepente polísia

Subdistritu Vemasse lori karta notifikasaun entrega ba nia atu marka prezensa iha tribunál hodi fó nia depoimentu.

Testamuña ESMB depoimenta katak momentu ne'ebá nia rona ema ida hakilar dehan viziñu sira ajuda lai tanba ne'e mak testamuña ba atu ajuda haketak arguida ho lezadu. Maibé to'o iha fatin nia la hare arguida baku lezadu tanba sira nain rua hamrik no hateke malu de'it.

Depois rona tiha deklarasaun hosi testamuña sira, defeza husu ba tribunál atu hetan tan faktu balu hosi prosesu ne'e, tanba ne'e husu ba tribunál atu rona tan deklarasaun hosi testamuna nain 3 seluk hanesan JJ, L no JA ba akontesimentu 16 Janeiru 2013.

Depois rona tiha pozisaun ministériu públiku no defeza, tribunál marka fali ba iha 18 Feveireiru 2015, tuku 14:00 lorokraik, atu kontinua rona tan testamuña sira nia deklarasaun.

6. Kazu krime ofensa integridade fizika grave - Nuc. 0326/14.PDBAU

Kompozisaun Tribunál : Kolektivu
Juis : Dr.Afonso Carmona, Dr. Hugo da Cruz Pui, Dr. José Q.S. Celetino
Ministériu Públiku : Dr. Domingos Barreto
Defeza : Dr. Juvinal Yanes
Konkluzaan : Omologa

Iha 10 Feveireiru, Tribunál Distritál Baucau omologu prosesu ba kazu ofensa ba integridade fizika grave ne'ebé komete hosi arguidu Janeiro Cardoso hasoru João da Costa Cardoso. Kazu ne'e akontese iha 16 Jullu 2012, iha Suku Saelari-Laga, Distritu Baucau.

Ministériu Públiku akuza arguidu katak iha 16 Jullu 2012 tuku 11: 00, arguidu nia karau tama ba iha lezadu nia to'os no han estraga lakeru ho talas. Tanba ne'e lezadu nervozu no tolok arguidu. Arguidu senti moe no hirus nune'e nia hakat ba hodi ta'a lezadu dala 2 kona iha liman kabun parte karuk no kona iha ulun.

Ministériu Públiku akuza arguidu kontra artigu 146 kódigiu penál kona-ba ofensa ba integridade fizika grave.

Iha prosesu julgamentu arguidu konfesa faktus hotu ne'ebé ministériu públiku akuza ba nia. Arguidu konfesa diak malu ona ho lezadu (nu'udar primu-irmaun), arguidu rekopera ona lezadu nia kanek ho osan US\$50,00, arguidu arrepente ba nia hahalok no subliña katak, durante ne'e nia iha iha antesedente krimínal seluk.

Entretantu lezadu konfirma ba tribunál katak arguidu taa duni nia iha parte liman kabun no ulun maibe lezadu konsidera kanek ne'e la du'un fó impaktu ba nia isin loloon no agora nia bele halo servisu hodi sustenta nia moris no nia mós perdua ona arguidu. Alende ne'e durante nia sofre kanek arguidu sempre ajuda hodi sosa aimoruk fó ba nia kuaze US\$50,00 tanba ne'e lezadu dehan diak malu ona ho arguidu.

Iha alegasaun finál, ministériu públiku mantein ninia akuzasaun, tanba arguidu konfesa nia sala katak momentu ne'e nia komete duni krime ofensa ba integridade fizika grave hasoru lezadu.

Ministériu Públiku argumenta katak, iha kazu ne'e la'ós hare ba kestaun diak malu ona, maibe hare ba krime ne'ebé arguidu komete ho nia gravidade. Tanba ne'e ministériu públiku husu ba tribunál atu aplika pena ne'ebé adekuaudu tuir artigu 146 kódigu penál kona-ba ofensa ba integridade fizika grave.

Entretantu defeza iha husu ba tribunál atu halo altersaun juridiku ba artigu 146 kódigu penál kona-ba ofensa ba integridade fizika grave, ba artigu 145 kódigu penál kona-ba ofensa ba integridade fizika simples. Bazeia ba produsaun prova katak, lezadu la sofre kanek todan no diak malu ona ho arguidu. Lezadu ho arguidu sei iha relasaun familia nu'udar primu-irmaun.

Depoisde avalia faktu ne'ebé produs durante julgamentu, tribunál halo altersaun juridiku ba artigu 146 kódigu penál ba artigu 145 kona-ba ofensa ba integridade fizika simples. Tanba arguidu ho lezadu halo ona akordu dame no lezadu husu desistensia ba keixa, tribunál tetu faktu sira no omologu prosesu ne'e.

7. Kazu krime ofensa ba integridade fízika simples-Nuc. 0284/11.PDBAU

Kompozisaun tribunál : Singulár
Juis : Dr. Hugo da Cruz Pui
Ministériu Públiku : Dr. Domingos Barreto
Defeza : Dr. Grigorio de Lima
Konkluzau : Omologa

Iha 10 FEVEREIRO 2015, TRIBUNÁL DISTRITÁL BAUCAU prezide julgamentu tentativa konsiliaaun no omologa krime ofensa ba integridade fizika simples ne'ebé involve arguidu Aquilis Sebastião da Costa hasoru lezadu José da Costa. Kazu ne'e akontese iha 22 JUÑU 2011 iha Suku Loilubu, Distrito Baucau.

Tribunál halo tentativa konsiliaaun, tanba antes ne'e arguidu ho lezadu iha ona akordu dame. Kazu ne'e akontese tanba arguidu ho lezadu hadau malu sira nia aman nia osan martir ka veteranus. Tribunál halo tentativa konsiliaaun no omologa prosesu ne'e bazeia ba akordu hosi arguidu ho lezadu nu'udar maun ho alin. Lezadu rasik ho konsensia hakarak desistência keixa ne'e no absove arguidu.

Antes ne'e, ministériu públiku akuza arguidu kontra artigu 145 kódigu penál kona-ba ofensa ba integridade fizika simples.

8. Kazu krime ofensa ba integridade fízika simples ho violénsia doméstika-Nuc. 0106/14.PDBAU

Kompozisaun tribunál : Singulár
Juis : Dr. Afonso Carmona

Ministériu Públiku : Dr. Alfonso Lopes
Defeza : Dr. Jonas H. da Costa
Konkluzau : Kondena MDC ho pena prizaun tinan 1 no suspende ba tinan 2, selu kustu judisial US\$ 20,00 no ba arguida EMF kondena ho pena prizaun fulan 6 suspende ba tinan 1

Iha 11 Feveiru 2015, Tribunál Distritál Baucau prezide julgamentu leitura sentensa no kondena arguidu MdC tanba provadu komete krime ofensa integridade fízika simples ho natureza violénsia doméstika hasoru EMF hanesan arguidu ninia feen primeíru.

Alende ne'e iha tempu hanesan tribunál mós kondena EMF ba krime ofensa ba integridade fízika simples hasoru JdC nu'udar arguidu MDC nia feen segundu. Kazu ne'e akontese iha 14 Dezembru 2013, iha Suku Wailili, Distritu Baucau.

Ministériu Públiku akuza katak, 14 Dezembru 2013, iha tuku 14:00 lorokraik, arguidu MdC diskute malu ho EMF nu'udar nia feen primeiru no haruka EMF sai hosi uma. Tanba ne'e, EMF lasimu liafuan ne'e, no hakarak kontinua hela nafatin iha uma tanba ne'e arguidu nervozu no tuku EMF nia ulun, no kaer iha nia fuk hodi riba ba rai.

Iha parte seluk, ministériu públiku mós akuza EMF komete ofensa integridade fízika simples hasoru JdC nu'udar arguidu MdC nia feen segundu. Ministériu Públiku akuza katak EMF basa EMF niaibun dala 1.

Relasiona ho kazu ne'e, ministériu públiku akuza arguidu MDC kontra artigu 145 Kódigu Penál kona-ba ofensa ba integridade fízika simples konjuga ho Lei Kontra Violénsia Doméstika no ba arguidu EMF akuza kontra artigu 145 Kódigu Penál kona-ba ofensa ba integridade fízika simples.

Iha tribunál arguidu MdC deklara katak akuzasaun ne'ebé inputa ba nia ne'e loos hotu, tanba nia baku duni nia feen primeiru. Arguidu mós informa ba tribunál katak, too agora nia feen primeíru ho sira nia oan nain 5 hela ketak iha Gari-Uai.

Arguida EMF mós deklara katak, akuzasaun ne'ebé ministériu públiku inputa ba nia ne'e loos hotu tanba nia laen arguidu MDC halo diskriminasaun ba nia. Tanba ne'e mak nia basa dala ida iha JdC niaibun. Lezada JdC nu'udar feen segundu hosi arguidu MDC.

Iha alegasaun finál ministériu públiku husu ba tribunál atu aplika pena adekua ba arguidu MDC no arguida EMF. Enkuantu defeza husu ba tribunál atu aplika pena ne'ebé la limite arguidu no arguida nia liverdade.

Depoisde avalia faktu ne'ebé produs durante julgamentu tribunál konklui prosesu ne'e no kondena arguidu MDC ho pena prizaun tinan 1 suspende ba tinan 2 inklui mós selu kustu judisiál US\$20,00 no kondena arguida EMF ho pena prizaun fulan 6 suspende ba tinan 1.

9. Kazu krime omesídiu simples no tentativu omesídiu-Nuc. 0275/14.PDBAU

Kompozisaun tribunál : Kolektivu
Juis : Dr. Antonio Fonseca

Ministériu Públiku : Dr. Alfonso Lopes
Defeza : Dr. Juvinal Yanes
Konkluzau : Adia

Iha 11 Feveireiru 2015, Tribunál Distritál Baucau adia julgamentu ba kazu krime omisídiu simples no tentativu omisídiu ne'ebé involve arguidu PdC, CP, LG, AG, DP, AM, NJPdS, IdJP no AdR hasoru DBdC. Kazu ne'e akontese iha 19 Marsu 2013, iha Suku Tirilolo, Distritu Baucau.

Prosesu julgamentu ne'e adia tanba arguidu nain rua; AM no NJPdS de'it mak marka prezensa no arguidu nain hitu seluk la marka prezensa sem justifikasaun maske tribunál hato'o ona karta notifikasaun ba sira.

Tanba ne'e, tribunál adia prosesu ne'e no marka fali julgamentu ba iha 08 Abril 2015, tuku 09:00 dadersan.

10. Kazu krime omisídiu simples no destruisaun, subtrasaun, okultasaun ka profanasaun ba kadaver-Nuc. 0026/14.PDBAU

Kompozisaun tribunál : Kolektivu
Juis : Dr. Afonso Carmona (*representa juiz kolektivu*)
Ministériu Públiku : Dr. Alfonso Lopes
Defeza : Dr. Juvinal Yanes
Konkluzau : Kondena ho pena tinan 13 fulan 6 prizaun

Iha 11 Feveireiru 2015, Tribunál Distritál Baucau prezide leitura julgamentu akordaun no kondena arguidu Mateus Ximenes tanba provadu komete krime omisídiu simples no destruisaun, subtrasaun, okultasaun ka profanasaun ba kadaver hasoru matebian Valenti Hornai. Kazu ne'e akontese iha 27 Abril 2014, iha Distritu Lautem.

Relasiona ho aktu ne'e, Ministériu Públiku akuza arguidu kontra artigu 138 Kódigu Penál kona-ba omisídiu simples konjuga ho artigu 224 Kódigu Penál kona-ba destruisaun, subtrasaun, okultasaun ka profanasaun ba kadaver

Iha julgamentu antes, ministériu públiku katak iha 27 Abril 2014 tuku 10:00 dader arguidu diskuti malu ho lezadu tanba lezadu dun arguidu mak oho lezadu nia karau. Tanba ne'e, lezadu nervozu no foti katana taa arguidu maibé la kona. Tanba ne'e, arguidu foti alu no baku lezadu to'o katana monu. Arguidu foti fali lezadu nia katana no taa dala ida iha lezadu nia kanuruk no iha lezadu nia kakorok no rezulta lezadu mate kedas iha fatin akontesimentu. Depois arguidu foti tali no kesi lezadu nia ain no dada lezadu ba hakoi subar iha to'os laran.

Iha prosesu julgamentu ne'ebé halao iha 27 Janeriu 2015 antes, arguidu konfesa katak faktus hirak ne'ebé ministériu públiku akuza ba nia.

Nune'e depoisde avalia faktu ne'ebé produs durante julgamentu tribunál konklui prosesu ne'e no kondena arguidu ho akumulasaun pena tinan 13 fulan 6 prizaun.

11. Kazu krime danu ho violénsia no ofensa ba integridade física simples-Nuc. 0590/14.PDBAU

Kompozisaun tribunál : Singulár
Juis : Dr. José Escurial (*Juis estajiaru*)
Ministériu Públiku : Dr. Domingos Barreto
Defeza : Dr. Jonas H. da Costa
Konkluzau : Adia

Iha 12 Feveireiru 2015, Tribunál Distritál Baucau adia julgamentu ba arguidu AdC, CdS no AA tanba diskunfia involve iha krime danu ho ofensa ba integridade física simples hasoru lezadu DXP. Kazu ne'e akontese iha 12 Novembru 2012, iha Suku Bahu, Distritu Baucau.

Julgamentu ne'e adia tanba arguidu sira la marka prezensa, maske tribunál fó ona karta notifikasaun ba sira.

Tribunál marka fali julgamentu ba iha 30 Abril 2015, tuku 09:30 dadersan no sei hasai karta mandadu detensaun ba arguidu sira wainhira sira la-kolabora ho justisa.

12. Kazu krime danu simples Nuc. 0240/13.PDBAU

Kompozisaun Tribunál : Singulár
Juis : Dr. José Q.S. Celestino (*Juis Stajiaru*)
Ministériu Públiku : Dr. Alfonso Lopes
Defeza : Dr. Jonas Henrique da Costa
Konkluzau : Kondena ho pena multa US\$236,25 ba arguidu nain 3 no absolve arguidu nain 1 seluk.

Iha 12 Feveireiru 2015, Tribunál Distritál Baucau prezide julgamentu ba kazu krime danu simple kontra arguidu Cosme Freitas, Jaime Pereira, Ilizario Freitas no Thomas Freitas ne'ebé involve iha krime danu simples hasoru Lorenzo da Silva. Kazu ne'e akontese iha 27 Maiu 2013, iha Suku Buruma, Distritu Baucau.

Antes ne'e, ministériu públiku akuza katak, iha 27 Maiu 2013, iha tuku 11:00 dadersan, arguidu nain 4 lori katana, dima, rama no besi naruk , sai husi uma ba lezadu nia hela fatin ka uma.

Wainhira arguidu sira to'o, arguidu sira estraga lezadu nia sasan hanesan kalen tahan 65, ai baluk lolon 8, inklui estraga nu'u oan hamutuk hu'un 66. Tuir lezadu katak, sei konverte karik sasan sira ne'e ba osan ka faan bele hetan U\$800.

Ministériu Públiku akuza arguidu sira kontra artigu 258 Kódigu Penál kona-ba danu simples.

Iha prosesu julgamentu arguidu Jaime Perreira hili dereitu nonok no arguidu nain tolu seluk nega akuzasaun balun. Arguidu nain 3 deklara katak sira la lori rama no dima no besi

naruk, maibe sira lori katana no estraga lezada nia sasan hanesan ai, kalen, inklui estraga nu'u oan sira.

Iha parte seluk, lezadu kontinua reforsa no mantein faktu sira iha akuzasaun no deklarata katak iha momentu ne'eba arguidu sira ba derepente de'it no nia lakosega halo asaun hasoru sira. Lezadu dehan nia hare no husik de'it arguidu sira estraga nia sasan, no taa kuak kalen tahan 36, nuu hun 33 no ai balok 8. Lezadu deklarata katak arguidu nain 3 mak estraga sasan sira ne'e maibe la inklui arguidu Jaime Pereira ne'ebé momentu ne'ebá hamrik hare deit.

Rona tiha arguidu sira no lezadu nia depoimentu tribunál husu ba ministériu públiku atu tama ba alegasaun finál. Iha alegasaun ministériu públiku husu ba tribunál atu absolve arguidu Jaime Perreira no aplika pena adekuaudu ba arguidu sira seluk.

Iha parte seluk, defeza mós konkorda ho alegasaun ministériu públiku no husu ba tribunál atu absolve arguidu Jaime Perreira no fó pena ne'ebé kman sem limita ba arguidu sira seluk nia liberdade.

Depois avalia faktus sira ne'ebé produz durante julgamentu, tribunál konklui prosesu ne'e no kondena arguidu Ilizario Freitas ho pena multa US\$105,00 no sei selu US\$1,00 kada loron durante loron 105. Tribunál mós aplika pena alternativa durante loron 70 prizaun kuandu arguidu la selu pena multa refere.

Ba arguidu Cosme Freitas tribunál aplika pena multa US\$78,75 no sei selu US\$0,75 sentavus kada loron durante loron 105. Tribunál mós aplika pena alternativa durante loron 70 prizaun, kuandu arguidu la selu pena multa refere.

Tuir-mai ba arguidu Thomas Freitas tribunál aplika pena multa US\$52,50 no sei selu US\$0,50 sentavus kada loron durante loron 105. Alternativamente tribunál aplika pena multa durante loron 70 prizaun kuandu arguidu la selu pena multa refere. Enkuantu ba arguidu Jaime Pereira tribunál absolve husi prosesu tanba la provadu komete krime.

13. Kazu krime danu agravadu-Nuc. 0237/14.PDBAU

Kompozisaun Tribunál : Singulár
Juis : Dr. Hugo da Cruz Pui, Dr. José Escurial (*Juis Stajiaru*) Dr. Jose Q.S. Celestino (*Juis Stajiaru*)
Ministériu Públiku : Dr. Domingos Barreto
Defeza : Dr. Juvinal Yanes
Konkluzau : Kondena ho pena multa US\$120,00

Iha 12 Feveireu 2015, Tribunál Distritál Baucau prezide julgamentu leitura sentensa ba arguidu Acacio Correia Gutres (*empresariu lokal*) tanba provadu komete krime danu agravadu hasoru lezadu Eduardo Sarmento (*funsonariu EDTL*). Kazu ne'e akontese iha 31 Marsu 2014, iha Sub distritu Venilale, Distritu Baucau.

Ministériu Públiku akuza katak iha 31/03/2014 tuku 15:00 lorokraik arguidu deskonfia lezadu ko'a sai osan pulsa US\$2,50 hodi benefisia ba nia an. Lezadu nu'udar funsionariu administrasaun iha EDTL Venilale. Tanba ne'e arguidu hiru ba keda kedas ba eskritoriu EDTL no hakilar lezadu, tuda rahun kalkulator ida iha meja no halo meja servisu ne'e nakles.

Kazu ne'e akontese tanba iha 31 /03/2014 tuku 15:00 lorokraik arguidu haruka nia feen ba sosa pulsa US\$15,00 iha eskritoriu EDTL, maibe lezadu nu'udar funsionariu EDTL ne'e ense de'it US\$12.50. Arguidu detekta hetan aktu ne'e bainhira nia ense pulsa ba sira nia kontador prepago.

Ministériu Públiku akuza arguidu kontra artigu 259 Kódigu Penál kona-ba danu agravadu.

Iha prosesu julgamentu arguidu konfesa faktu sira hotu no arrepende nia hahalok tanba estraga estadu nia sasan. Maske nune'e argudu deklarasaun katak nia troka fali ona sasan sira hanesan kalkulator ida no meja foun ida ba administrasaun EDTL Venilale, Baucau.

Iha alegasaun finál, ministériu públiku husu ba tribunál atu fó pena suspensaun ho tinan naruk ba arguidu atu eduka arguidu no ema hotu atu respeitu sasan estadu. Ministériu Públiku konsidera katak mesmu arguidu rekoñese nia sala, maibe ministériu públiku hare liuba krime ne'ebé arguidu komete sériu.

Defeza husu ba tribunál atu aplika pena multa ba arguidu tanba arguidu konfesa nia hahalok no rekopera fali ona sasan ne'ebé nia estraga.

Depois avalia faktus sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$120,00 no kada loron sei selu US\$1,00 durante loron 120 plus selu kustu judisiál US\$20.00. Tribunál mós aplika pena alternativa durante loron 80 prizaun kuandu arguidu la selu pena multa refere.

14. Kazu krime abuzu seksual ba menor no sukuestru Nuc. 0399/13.PDBAU

Kompozisaun tribunál : Kolektivo
Juis : Dr. Antonio Fonseca (*reprazenta Juis kolektivu*)
Ministériu Públiku : Dr. Domingos Barreto
Defeza : Dr. Grigoriu de Lima
Konkluzaan : Adia

Iha 13 Feveireiru 2015, Tribunál Distritál Baucau adia julgamentu ba kazu krime abuzu seksuál ba menór no sukuestru ne'ebé diskunfia involve arguidu AdS hasoru lezada LC (*tinan 14*). Kazu ne'e akontese iha 09 Agostu 2012, iha Vila Nova, Distritu Baucau.

Prosesu julgamentu ne'e adia tanba tribunál lakonsege identifika lezada nia hela fatin ka hetan sertidaun negativa. Tanba ne'e, tribunál marka fali julgamentu ba iha 07 Maiu 2015, tuku 14:30 lorokraik.

15. Kazu krime ofensa ba integridade fízika simples no danu simples-Nuc. 0308/13.PDBAU

Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Alfonso Lopes
Defeza : Dr. Jonas H. da Costa
Konkluzau : Sei kontinua prosesu

Iha 17 Feveireiru 2015, Tribunál Distritál Baucau prezide julgamentu ba kazu krime ofensa ba integridade fizika simples no danu simples ne'ebé involve arguida OSX, hasoru lezada AM. Kazu ne'e akontese iha 16 Jullu 2013, iha Pouzada , Distritu Baucau.

Ministériu Públiku akuza katak iha 16 Jullu 2013, tuku 10:00 dadersan, iha hotel pouzada Baucau, arguida ho lezada diskuti malu kona-ba kontratu servisu. Seim razaun ruma ne'ebé klaru arguida tuku kedas lezada nia ulun dala 3, tuku iha liman kabun no matan fukun karuk no kauza lezada monu ba rai. Alende ne'e arguida mós rasta kotu lezada nia korente.

Ministériu Públiku akuza arguidu kontra artigu 145 kódigu penál kona-ba ofensa ba integridade fizika simples konjugadu ho artigu 258 kódigu penál kona-ba danu simples.

Iha prosesu julgamentu arguida deklara katak, kazu ne'e akontese tanba lezada mai hakilar arguida dehan "tanba sa mak ó la tuir enkontru." Tanba arguida sei koalia hela ho Diretór Sr. Abilio Freitas nune'e nia dehan liafuan "palerma" ba lezada. Derepente lezada halo atake no tuku arguida nia kabun. Tanba nee arguida basa lezada dala 1 iha matan fukun karuk, hakuak lezada riba ba janela no rezulta lezada nia ulun kanek.

Arguida mós deklara katak lezada nia korenti kotu tanba lezada rasta arguida nia kalsa atu monu, nune'e mak arguida kaer kona lezada nia korente no rasta halo kotu.

Lezada deklara katak, alende faktus sira iha akuzasaun, arguida mós tuku iha nia matan no rezulta lezada nia oklu monu tun ba rai, arguida tuku tan dala 1 iha lezada nia liman no rezulta lezada monu ba rai wainhira nia hakruk atu foti fali nia oklu.

Iha alegasaun finál, ministériu públiku husu ba tribunál atu aplika pena suspensaun ba arguida tanba provadu komete duni krime hasoru lezada.

Entretantu defeza husu ba tribunál atu tetu sirkunstánsia hotu atu la fó pena ne'ebé limita arguida nia direitu.

Depois rona tiha alegasaun finál, tribunál marka fali prosesu le'e leitura sentensa ba iha 03 Marsu 2015 tuku 14:00 dadersan.

16. Kazu krime omisídiu simples no tentativa omesídiu Nuc. 0116/14.PDBAU

Kompozisaun tribunál : Kolektivu
Juis : Dr. Afonso Carmona (*reprezenta Juis kolektivu*)

Ministériu Públiku : Dr. Alfonso Lopes
Defeza : Dr. Grigorio de Lima
Konkluzau : Adia

Iha 17 Feveireiru 2015, Tribunál Distritál Baucau adia julgamentu ba kazu krime omisídiu simples no tentativa omisídiu ne'ebé diskunfia involve arguidu MdJ no OdJ hasoru lezadu ZdC. Kazu ne'e akontese iha 14 Dezembru 2014, iha Distritu Lautem.

Prosesu julgamentu ne'e adia tanba arguidu OdJ no lezadu la marka prezensa maske tribunál fó ona karta notifikasaun ba sira. Tanba ne'e tribunál marka fali julgamentu ba iha 22 Abril 2015, tuku 14:00 lorokraik.

Tribunál deklara katak sei hasai karta mandadu detensaun ba arguidu OdJ tanba lakolabora ho justisa.

17. Kazu krime abuzu seksuál ba menór ho natureza incestu - Nuc. 0112/12.PDBAU

Kompozisaun Tribunál : Kolektivu
Juis : Dr. Afonso Carmona, Dr. Antonio Fonseca, Dra. Ercilia de Jesus (*juisa estajiáriu*)
Ministériu Públiku : Dr. Alfonso Lopes
Defeza : Dr. Grigorio de Lima
Konkluzau : Sei kontinua prosesu

Iha 17 Feveireiru 2015, Tribunál Distritál Baucau kontinua prosesu julgamentu ba kazu krime abuzu seksuál ba menór ne'ebé diskunfia involve hosi arguidu GC nu'udar aman, hasoru lezada nu'udar oan. Kazu ne'e akontese iha 12 Dezembru 2012, iha Distritu Baucau.

Ministériu Públiku akuza katak iha 12 Dezembru 2012, tuku 019:00 kalan, arguidu tama ba lezada nia kuartu laran no halo relasaun seksual dala 4 ho lezada. Tuir relatóriu ezaminasaun forénsiku, lezada foin primeiraves halo relasaun seksuál.

Kazu ne'e akontese wainhira arguidu haruka lezada atu taka ahi maibe lezada lakoi. Tanba ne'e, arguidu tama ba lezada nia kuartu laran no taka lezada niaibun ho lipa ne'ebé nia kabala no ameasa katak, '*labele koalia sai ba ema seluk, se lae hau oho tiha ó.*' Depoisode amiasa hanesan ne'e arguidu komete violasaun seksuál dala 4 hasoru lezada.

Ministériu Públiku akuza arguidu kontra artigu 177 kódigu penál kona-ba abuzu seksuál ba menór.

Durante prosesu julgamentu arguidu uza direitu nonok. Mesmu nune'e, lezada deklara ba tribunál katak antes akontese arguidu komete violasaun seksual hasoru nia, arguidu tenta book nia dala 3, durante kalan 3 tui-tuir malu maibe lakonsege tanba lezada lakohi tanba arguidu nu'udar aman rasik.

Wainhira tama ba kalan ba-dala 4 arguidu obriga lezada halo relasaun seksuál ho maneira taka lezada niaibun ho hena. Lezada dehan iha momentu ne'ebá lezada estuda hela iha nia

kuartu laran derepentí arguidu ba dehan ba lezada atu halo mate lampu maibé lezada lakohi. Tanba lezada lakoi hamate lampu, derepentí arguidu tama ba no hamate lampu no kesi metin lezada niaibun ho hena, no arguidu komete violasaun seksuál hasoru lezada dalarua ho nia.

Lezada deklara liutan katak iha momentu ne'ebá lezada atu hakilar maibe arguidu kous lori lezada ba hatoba iha nia kama okos, no wainhira arguidu toba dukur hela mak lezada halai sai no ba hato'o kedas keixa ba iha Eskuadra Polísia.

Iha alegasaun finál, ministériu públiku husu ba tribunál aplika pena prizaun ne'ebé todan liu ba arguidu mesmu arguidu hili direitu nonok, maibe lezada konfirma faktus hotu tuir akuzasaun inisiu ne'ebé hato'o ba ministériu públiku.

Entertantu defeza husu ba tribunál atu aplika pena ne'ebé adekua ba arguidu no husu ba tribunál atu tetu sirkunstánsia hotu inklui durante julgamentu arguidu kolabora diak ho justisa.

Rona tiha alegasaun hosi ministériu públiku no defeza, tribunál marka fali prosesu leitura sentensa ne'e ba iha 04 Marsu 2015 tuku 14:00 dadersan.

18. Kazu krime ofensa ba integridade fizika simples-Nuc. 0553/13.PDBAU

Kompozisaun tribunál : Singulár
Juis : Dr. Hugo da Cruz Pui
Ministériu Públiku : Dr. Alfoso Lopes
Defeza : Dr. Jonas H. da Costa
Konkluzau : Omologa

Iha 17 Feveiru 2015, Tribunál Distritál Baucau halo tentativa konsiliaun no omologa kazu krime ofensa ba integridade fizika simples ne'ebé involve hosi arguidu Andre Ximenes Neto no Abrão de Asis hasoru lezadu Filomino Soares Hornai. Kazu ne'e akontese iha 21 Outubru 2013, iha Suku Buibau, Distritu Baucau.

Tribunál halo tentativa konsiliaun tanba antes ne'e arguidu sira ho lezadu halo ona akordu dame, no lezadu perdua ona arguidu sira. Motivu hosi akontesimentu ne'e hahu hosi lezadu ho arguidu sira halimar dada liman, no rezulta lezadu nia liman moras.

Tanba ne'e, lezadu hakarak desiste fali keixa tanba sira sei iha relasaun familia. Bazeia ba pedidu ne'e tribunál halo tentativa konsiliaun no omologu prosesu ne'e.

Antes ne'e ministériu públiku akuza arguidu kontra artigu 145 Kódigu Penál kona-ba ofensa ba integridade fizika simples.

19. Kazu krime ofensa ba integridade fizika simples ho natureza violénsia doméstika – Núc. 0452/12.PDBAU

Kompozisaun tribunál : Singulár
Juis : Dr. Antonio Fonseca

Ministériu Públiku : Dr. Luis H. Rangel da Cruz
Defeza : Dr. Juvinal Yanes
Konkluzau : Kondena ho pena prizaun tinan 1 no suspende ba tinan 1 fulan 6

Iha 18 Fevreiru 2015, Tribunál Distritál Baucau kondena arguidu MP ba tinan 1 prizaun suspende ba tinan 1 fulan 6 tanba provadu komete krimi ofensa ba integridade fizika simples hasoru *feen*. Kazu ne'e akontese iha 18 Setembru 2012, iha Distritu Viqueque.

Tribunál prova katak iha 18 Setembru 2012, maisumenus iha oras 15:00 lorokraik, arguidu baku ho aidona dalarua iha lezada iha kotuk laran, tebe dala 1 iha lezada nia kanotak, no baku dala barak iha lezada nia isin wainhira lezada tenta halai. Kazu ne'e akontese tanba arguidu hakarak ba joga karta ho nia maluk sira no lezada la fó osan \$20.00, ba arguidu.

Antes ne'e, iha julgamentu arguidu konfesa ba tribunál katak sira diak malu ona, no arguidu arepende ba nia hahalok, foin primeiraves komete krime la iha antesidente kriminál seluk.

Bazeia ba faktus hirak ne'e tribunál konklui prosesu no kondena arguidu ho pena prizaun tinan 1 suspende ba tinan 1 fulan 6. Tribunál mós aplika pena efetiva tinan ida iha prizaun kuandu arguidu komete foun hasoru lezada ka hasoru ema seluk

20. Kazu krime ofensa ba integridade fizika simples - Nuc. 0585/12.PDBAU

Kompozisaun Tribunál : Singulár
Juis : Dr. José Escurial
Ministériu Públiku : Dr. Alfonso Lopes
Defeza : Dr. Jonas H. da Costa
Konkluzau : Sei kontinua prosesu

Iha 19 Fevreiru 2015, Tribunál Distritál Baucau prezide julgamentu ba kazu krime ofensa ba integridade fizika simples ne'ebé involve hosi arguidu CBM no AFM, hasoru lezadu AF no NBF. Kazu ne'e akontese iha 23 Novembru 2013, iha Suku Gari-Uai, Distritu Baucau.

Ministériu Públiku akuza katak iha 23 Novembru 2013 tuku 09:30 iha Suku Gari-Uai, arguidu CBF baku lezadu NBF nia liman sikun no rezulta lezadu nia liman kanek no ran. Aleinde ne'e, arguidu CBF baku tan lezadu AF nia liman fuan karuk.

Tuir-mai arguidu AFM ne'ebé iha momentu ne'eba hamrik besik lezadu AF nia kotuk aporveita hodi tuku dala 1 iha nia kanuruk no rezulta lezadu monu ba rai. Kazu ne'e akontese tanba lezadu sira diskute malu kona-ba problema hadau malu rai.

Ministériu Públiku akuza arguidu kontra artigu 145 kódigu penál kona-ba ofensa ba integridade fizika simples.

Iha prosesu julgamentu arguidu CBF deklarata katak, nia mak baku duni lezadu AF nia liman fuan. Arguidu dehan nia laiha intensaun atu baku lezadu NBF maibe wainhira nia halai mai

atu satan netik au mak au ne'e kona fali ba NBF nia liman sikun. Entretantu arguidu AFM nega katak nia involve iha kazu ne'e tanba momentu ne'e nia la-iha fatin akontesimentu no nia dehan nia ba hein hela karau.

Lezadu AF deklarara katak, arguidu baku nia tanba nia dehan ba arguidu katak "*aban bairua imi mate, imi nia sumasu sei la hakoi ona iha knua laran*". Tanba ne'e mak provoka arguidu CBM hirus hodi baku nia ho au maibe la kona iha nia ulun no kona fali iha nia liman fuan no kotuk laran dalarua.

Lezadu mós kontinua liu tan katak wainhira arguidu atu baku nia maibe depois kona fali NBF nia liman sikun no ran tanba NBF tenta atu satan netik au ne'ebé arguidu uza hodi baku ba 'nia liman no kotuk laran.'

Alende ne'e, lezadu NBF konfirma katak nia mak derepentí halai tama atu satan netik arguidu, nune'e au kona fali nia. Lezadu mós dehan nia hare derepente lezadu AF monu ba rai tanba arguidu AFM tuku subar deit lezadu nia kanuruk hosi kotuk.

Testamuña MLdJB (*nu'udar xefe suku*) deklarara katak nia hare arguidu AMF husi kotuk tuku dala 1 iha lezadu AF nia kanuruk no rezulta monu ba rai. Nu'udar xefe suku la tolera atu problema ne'e sai boot, tanba ne'e nia kontaktu polisia mai halo intervensi ba situasaun refere.

Iha alegasaun finál, ministériu públiku husu ba tribunál atu aplika pena tuir artigu 145 Kódigu Penál kona-ba ofensa ba integridade fizika simples.

Entretantu defeza husu ba tribunál aplika pena ne'ebe adekua ba arguidu sira no husu ba tribunál atu tetu sirkunstánsia hotu tanba arguidu sira konfesa sala no arepende sira nia hahalok no kolabora ho justisa. Tanba ne'e husu tribunál atu aplika pena ne'ebé kmaan ba arguidu sira.

Rona tiha alegasaun hosi ministériu públiku no defeza, marka fali prosesu leitura sentensa ba iha 06 Marsu 2015 tuku 14:30 dadersan.

21. Kazu krime abuzu seksuál ba menór no agrvasaun - Nuc. 0269/13.PDBAU

Kompozisaun tribunál	: Singulár
Juis	: Dr. José Gonçalves
Ministériu Públiku	: Dr. Alfonso Lopes
Defeza	: Dr. Jonas H. da Costa
Konkluzau	: Adia

Iha 19 Fevreiru 2015, Tribunál Distritál Baucau adia prosesu julgamentu ba arguidu AdS, ne'ebé diskunfia involve iha krime abuzu seksuál ba menór no agrvasaun hasoru lezada ne'ebé sei ho idade tinan 5. Kazu ne'e akontese iha 03 Junu 2013, iha Distritu Baucau.

Prosesu julgamentu ne'e adia tanba juis titulár ba kazu ne'e sei tuir hela formasaun iha Portugal no sei fila mai iha Timor Leste iha Marsu 2015 nia laran. Tanba ne'e, tribunál seidauk marka fali data fiksi ba prosesu julgamentu ne'e.

22. Kazu krime ofensa ba integridade fízika Grave-Nuc. 0459/13.PDBAU

Kompozisaun Tribunál : Koletivu
Juis : Dr. Afonso Carmona
Ministériu Públiku : Dr. Domingos Barreto
Defeza : Dr. Jonas H. da Costa
Konkluzau : Omologa

Iha 19 Feveireiru 2015, Tribunál Distritál Baucau omologa arguidu AF hosi kazu krime ofensa ba integridade fizika grave hasoru HdS. Kazu ne'e akontese iha 22 Setembru 2010, iha Lospalos, Distritu Lautem.

Antes prezide leitura akordaun tribunál kolektivu konkorda hodi halo alterasaun juridiku ba artigu 146 Kódigi Penál ba fali artigu 145 kona-ba ofensa ba integridade fizika simples.

Bazeia ba akordu dame ne'ebé arguidu ho lezadu halo ona, no pedidu dezistensia hosi lezadu ba tribunál, nune'e tribunál omologa prosesu ne'e.

Antes ne'e, ministériu públiku akuza arguidu kontra artigu 146 kódigiu penál kona-ba ofensa ba integridade fizika grave.

23. Kazu krime ofensa ba integridade fízika simples – Núc. 0121/12.PDBAU

Kompozisaun tribunál : Singulár
Juis : Dra. Ercilia de Jesus (*Juiz satajariu*)
Ministériu Públiku : Dr. Domingos Barreto
Defeza : Dr. Grigorio de Lima
Konkluzau : Omologa

Iha 24 Feveireiru 2015, Tribunal Distritál Baucau prezide julgamentu tentativa konsiliaun no omologa kazu krime ofensa ba integridade fízika simples ne'ebé involve arguidu Jacinto da Costa hasoru lezadu Januario Manuel. Kazu ne'e akontese iha 09 Marsu 2013, iha Bahu, Distritu Baucau.

Atraves hosi julgamentu tentativa konsiliaun ne'e arguidu rekoñese nia sala no husu diskulpa ba lezadu iha tribunál nia oin. Arguidu deklarata katak nia arrepende nia hahalok no fo ona osan US\$50,00 ba lezadu hodi kura nia kanek.

Aleinde ne'e, lezadu konfirma katak nia simu duni osan \$50,00 husi arguidu no deklarata katak nia perdua ona arguidu. Lezadu mós deklarata katak sira sei iha relasaun família tanba ne'e hakarak dada fali kazu ne'e. Bazeia ba pedidu dezistensia ne'e, tribunál omologa prosesu.

Antes ne'e, ministériu públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

24. Kazu krime ofensa ba integridade fízika simples ho natureza violénsia doméstika – Núc. 0063/12.PDBAU

Kompozisaun tribunál : Singulár
Juis : Dr. José Escurial (*Juiz stajiaru*)
Ministériu Públiku : Dr. Alfonso Lopes
Defeza : Dr. Grogriu de Lima
Konkluzau : Kondena pena prizaun fulan 10 suspende tinan 1 fulan 6

Iha 24 Fevreiru 2015, Tribunál Distritál Baucau kondena arguidu IAdS nu'udar aman ne'ebé provadu komete krime ofensa ba integridade fízika simples hasoru nia oan (DAMS). Kazu ne'e akontese iha 09 Dezembru 2011, iha Venilale, Distritu Baucau.

Tribunál prova katak iha 09 Dezembru 2011, tuku 11:00 dader iha Venilale, arguidu moras hela no husu ajuda ba nia feen atu halo susu-ben maibe nia feen haruka tutan fali lezada DAMS. Tanba de'it lezada halo susu-ben kleur liu, arguidu hirus no basa dala 1 iha lezada nia hasan no taa kanek lezada nia liman laran ho tudik.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 1, 2 no 3 Lei Kontra Violénsia Doméstika.

Durante julgamentu arguidu konfesa faktu sira ne'e no deklara katak nia arrepende ninia hahalok no diak malu ona ho lezada. Arguidu mós durante ne'e laiha antesidente kriminais seluk, foin primeiraves halo hasoru lezada.

Bazeia ba faktu hirak ne'e tribunál konklui prosesu ne'e no kondena arguidu ho pena prizaun fulan 10 no suspende ba tinan 1 fulan 6.

25. Kazu krime ofensa ba integridade fízika simples-Nuc. 0547/14.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Alfonso Lopes
Defeza : Dr. Grigorio de Lima
Konkluzau : Sei kontinua prosesu

Iha 24 Fevereiru 2015, Tribunál Distritál Baucau hala'o prosesu julgamentu ba krime ofensa ba integridade fízika simples ne'ebé involve arguidu AdCF(*membru polisia investigador PNTL*) no VF (*membru PNTL-Task Force*) hasoru EFC. Kazu ne'e akontese iha 03 Maiu 2014, iha Suku Wailili, Distritu Baucau.

Ministériu Públiku akuza katak iha 03 Maiu 2014, tuku 10: 00 dader, arguidu AdCF tebe dala 2 iha lezadu nia kabun no hirus matan no arguidu VF mós tebe dala 2 iha lezadu nia

kabun no hirus matan, fai ho stik dala 4 iha lezadu nia kabas. Kazu ne'e akontese tanba lezadu lakoi atu Señor Nicolao ke'e bee dalan (kadoras) tuir nia natar laran.

Ministériu Públiku akuza arguidu sira kontra artigu 145 Kódigu Penál kona-ba ofensa ba integridade fízika simples.

Iha prosesu julgamentu arguidu AdCF nega faktus ne'ebé ministériu públiku inputa ba nia. Arguidu VF konfesa katak nia baku duni lezadu ho stik maibe kona de'it iha lezadu nia katana la'os lezadu nia kabas. Kona-ba faktus seluk arguidu nega la-halo hasoru lezadu.

Entretantu, lezadu kontinua mantein faktu sira ba tribunál, katak, nia hetan duni tebe dala 2 hosi arguidu VF iha nia kabun no hirus matan no fai ho stik dala 4 iha nia kabas. Aleinde ne'e, lezadu mós deklara katak arguidu AdCF tebe dala rua iha nia kabun no hirus matan to'o nia monu ba rai. Lezadu dehan katak arguidu nain rua ne'e mai ho nia kolega polisia nain 7 ho kareta.

Depoisde rona tiha lezadu no arguidu sira, tribunál marka fali julgamentu ba iha 06 Marsu 2015 tuku 09 :00 dadersan, hodi kontinua rona testamuna ZF.

26. Kazu krime ofensa ba integridade fízika simples ho natureza violénsia doméstika Nuc. 0483/13.PDBAU

Kompozisaun tribunál	: Singulár
Juis	: Dr. Hugo da Cruz Pui
Ministériu Públiku	: Dr. Alfonso Lopes
Defeza	: Dr. Grigorio de Lima
Konkluzau	: Sei kontinua prosesu

Iha 25 Fevereiru 2015, Tribunál Distritál Baucau prezide julgamentu ba kazu krime ofensa ba integridade fizika simples ho natureza violénsia doméstika ne'ebé involve hosi arguidu JSF hasoru nia feen (FP). Kazu ne'e akontese iha 15 Outubru 2013 iha Venilale, Distritu Baucau.

Ministériu Públiku akuza katak iha 15 Outubru 203, iha tuku 19:00 kalan, arguidu no lezada diskuti-malu kona-ba fahi etun (fahi nia hahan). Tanba ne'e arguidu nervozu no ho ai ida baku iha lezada nia kotuk dala 1, tuku dala 6 iha lezada nia ulun no buti lezada nia kakorok no riba ba rai to'o lezada nia liman kanek no moras. Kazu ne'e akontese iha Uma - Ana Uiku Venilale, Distritu Baucau.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho Lei Kontra Violénsia Doméstika.

Iha prosesu julgamentu arguidu konfesa faktu sira hotu ne'ebé ministériu públiku inputa ba nia no rekoñese katak faktu sira ne'e loos hotu.

Iha alegasaun finál, ministériu públiku husu ba tribunál atu fó pena ne'ebé adekuaudu tuir arguidu nia hahalok. Defeza konkorda ho alegasaun ministériu públiku atu aplika pena adekuaudu ba arguidu. Maske nune'e, defeza husu ba tribunál atu tetu sirkunstánsia hotu

inklui konsidera arguidu foin primeiraves komete krime, laiha antesidente kriminais seluk, konfesa faktus no arepende ba nia hahalok nsst.

Rona tiha alegasaun hosi ministériu públiku no defeza, tribunál marka fali prosesu rona leitura sentensa ba iha 03 Marsu 2015 tuku 14:00.lorokraik.

27. Kazu krime kondusaun perigoza Nuc. 0283/12.PDBAU

Kompozisaun Tribunál : Singulár
Juis : Dr. Ercilia de Jesus
Ministériu Públiku : Dr. Domingos Barreto
Defeza : Dr. Grigorio de Lima
Konkluzaan : Sei kontinua prosesu

Iha 26 Feveireiru 2015, Tribunál Distritál prezide julgamentu ba krime kondusaun perigoza ne'ebé involve hosi arguidu FOIdSS hasoru lezadu HX. Kazu ne'e akontese iha 30 Maiu 2012, iha Subaun kiik, Distritu Manatuto.

Ministériu Públiku akuza katak, iha 30 Maiu 2012 arguidu lori kareta fuso ida ho nú. matrikula 52.856 TLS no tula foos MTCI tolenada 5 hosi dirasaun Dili ba Manatuto. To'ó iha dalan kurva area subaun kiik, arguidu hasoru malu ho bus Lelena ne'ebé rejista ho nú. matrikula 32.215 TLS hosi dirasaun Manatuto mai Dili.

Arguidu redus kareta nia velocidade maibe okupa bus Lelena nia dalan no kose bus Lelena nia kotuk. Hosi asidente ne'e kauza mós pasajeiru karpintaria ida nia liman kotu sai hosi nia isin lolon.

Ministériu Públiku akuza arguidu kontra artigu 209 Kódigu Penál kona-ba kondusaun perigosa ne'ebé bele hetan kastigu hosi tinan 1 too tinan 4 prizaun.

Iha prosesu julgamentu arguidu deklara katak, momentu ne'e arguidu ho kareta hosi direasaun Dili atu ba Manatuto. Wainhira to'ó iha kurva Subaun-kiik, nia hasoru bus Lelena no nia hare bus ne'e halai ho velocidade makas no derepente bus ne'e nia kotuk baku ba fuso nia oin. Arguidu deklara katak lakonsege ses no kose kareta bus ne'e nia kidun.

Arguidu dehan nia lahatene hosi akontesementu ne'e rezulta ema kanek ka tohar tanba nia lakonsege tun hare. Arguidu deklara katak, nia konsege para kareta atu tun ba halo inspesaun ba bus nia lolon maibe rona ema barak hakilar arguidu senti tauk no halai maizumenus to'ó kilometru ida, hafoin sae motor hodi apresenta an ba iha Eskudra polisia Distritu Manatuto.

Arguidu deklara nia iha karta kondusaun. Arguidu mós konfesa to'ó agora seidauk ajuda lezadu tanba senti tauk atu ba hasoru lezadu ho nia familia sira bele halo krime hasoru nia.

Lezadu deklara katak, momentu ne'e nia sae bus Lelena hosi direasaun Manatuto atu mai Dili. Lezadu deklara katak nia dukur no tu'ur iha kareta laran, maibe derepente hakfodak no desmaia tanba hare nia liman kotu no monu tun tiha ona iha aspal leten.

Lezadu mós admira tanba antes ne'e nia koko atu loke vidru janela ne'ebé nia tuur besik maibe ladiak. Lezadu dehan antes asidente ne'e nia tula hela nia liman iha kdaeira nia liman leten.

Lezadu hakfodak wainhira mediku sira halo ona tratamentu ba nia liman iha Ospital Nasionál Guido Valadares Dili.

Lezadu hanesan ema karpintariu ida ne'ebé durante ne'e servisu hela iha misaun Fatumaka ho salariu kada fulan US\$300,00. Lezadu iha feen ida no oan nain lima. Lezadu mós dehan ate agora arguidu ho nia patraun nunka vizita nia atu fó apoiu ruma.

Testamuna LdJB haktuir katak, nia hare rasik iha momentu ne'e kareta fuso ne'e halai makas, hosi direasaun Dili atu ba Manatuto. Testamuna hakfodak tanba derepente fuso ne'e lakonsege sees no soke bus ne'e nia kotuk. Testamuña deklara katak nia hamutuk ho pasajeiru sira seluk tun hare lezadu nia liman monu tun ona iha aspal leten, no wainhira sira hateke ba kareta fuso ne'e nia kondutor ho nia testamuña JIdSS halai ona.

Testamuna JIF deklara katak, nia tu'ur besik lezadu ne'ebé nia liman kotu. Testamuña deklara katak, nia hare kareta fuso nia espelu oin mak kose kuak janela hodi kait lori lezadu nia liman to'o kotu.

Tuir-mai testamuna JIdSS depoimenta katak, momentu ne'e nia tu'ur besik ho arguidu ne'ebé lori kareta fuso maibe halai neneik, tanba sae rai lolon. Testamuña dehan sira hasoru malu ho bus ne'e iha kurva. Testamuna dehan bus ne'e lakonsege trava nune'e wainhira fila kareta ba sorin karuk hodi baku kareta nia loloon parte kotuk no kose ba iha kareta fuso nia ulun. Testamuña deklara katak, nia hakfodak hare ema nia liman monu tuun ona iha aspal leten.

Depoisde rona tiha parte sira, tribunál marka fali julgamentu foin ba iha 06 Marsu 2015, iha tuku 11.30 dader hodi halo inspesaun ba fatin akontesimentu (*local do crime*),

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org